

Reforma sudske uprave i organizacije rada u sudovima u Bosni i Hercegovini pokrenuta

Direktor Nezavisne pravosudne komisije (IJC), sudija Rakeľ Surlien, sa zadovoljstvom objavljuje početak novog projekta sudske reforme. Finansiran od strane Norveške vlade i pod pokroviteljstvom Nezavisne pravosudne komisije, ovaj projekat će se fokusirati na sudsku upravu i organizaciju rada u sudovima Bosne i Hercegovine. Projekat ima podršku oba entitetska ministarstva pravde.

Ovaj projekat, koji će koštati oko 250,000 KM (125,000 Eura) ima za cilj povećanje efikasnosti i djelotvornosti pravosudnog sistema i poboljšanje vršenja sudske funkcije i usluga koje ona pruža javnosti. Poseban naglasak će se staviti na obezbjeđenje da sudski sistem adekvatno i na vrijeme odgovori potrebama i očekivanjima javnosti kroz uvođenje novih metoda u postupanju sa predmetima i efikasnijom administrativnom praksom.

Prva faza koja će trajati tri mjeseca, a realizovaće je tim od pet međunarodnih i domaćih stručnjaka, sastojaće se od preliminarne procjene trenutne situacije u sudovima i preporuka za njeno poboljšanje. Na čelu tima je sudija Anne Austbo, predsjednik jednog od najvećih prvostepenih sudova u Norveškoj.

U ovoj fazi projekta odabrano je pet sudova: Osnovni sud u Banja Luci, Okružni sud Srpsko Sarajevo, Kantonalni sud u Zenici i općinski sudovi u Konjicu i Ljubuškom. Oni su odabrani jer se razlikuju po veličini i funkciji. Tim stručnjaka je prvi put juče posjetio Kantonalni sud u Zenici, a danas će posjetiti Općinski sud u Konjicu.

Nezavisna pravosudna komisija se nada da će preporuke tima biti realizovane u drugoj fazi projekta koja će početi krajem ove godine. Svi sudovi u BiH će imati koristi od rješenja koje ovaj tim stručnjaka bude predložio.

Sudija Austbo je naglasila da su za pravosudnu reformu bitni sudovi koji dobro funkcionišu. "U Evropi smo posljednjih godina uočili mnoge promjene u metodama rukovođenja sudovima koje su umnogome doprinijele efikasnijem radu pravosudnog sistema. Nadam se da će ta iskustva biti od koristi i za Bosnu i Hercegovinu".

Ovaj projekat dopunjuje ostale aktivnosti Nezavisne pravosudne komisije, čiji je cilj povećanje kvaliteta i efikasnosti pravosudnog sistema, posebno u reformi procesnih zakona koji regulišu sudski postupak.